

# MAGKINABUHI DIHA SA UG UBAN SA DIOSNONG TRINIDAD

Mensahe 4

## Magkinabuhi uban sa Diosnong Trinidad

(1)

### Magkinabuhi uban ni Cristo nga Emmanuel ug Pakinabuhion ang Nabanhawng Cristo sa Sulod Nato

Basahong Kasulatan: Mat. 1:21-23; 18:20; 28:20; 2 Tim. 4:22; Juan 14:17

- I. Ang pagkinabuhi nato diha sa Diosnong Trinidad pagpabilin man nato Kaniya, pagpuyo Kaniya nga panimalay nato; ang pagkinabuhi uban sa Diosnong Trinidad pagpabilin man Niya kanato, aron mag-uban nato ang Iyang presensya, persona, aron mapahimuslan nato—Juan 15:4:**
  - A. Ang Espiritung nagpabilin, ang Espiritung nagpuyo sa sulod, mao ang elemento ug ginsakpan sa pagpabilinay, pagpuy-anay, nato ug sa Tulo-usang Dios—1 Juan 4:13; 16.
  - B. Kinahanglan duna tay linangkob nga panan-aw sa tibuok pinadayag sa Bag-ong Tugon—ang ikaupat nga bahin ( $\frac{1}{4}$ ) sa Bag-ong Tugon kalabot man sa pagkinabuhi nato diha sa Tulo-usang Dios, samtang ang tulo sa upat ka bahin ( $\frac{3}{4}$ ) sa Bag-ong Tugon kalabot sa pagkinabuhi nato uban sa Tulo-usang Dios.
- II. Ang pagkinabuhi uban sa Diosnong Trinidad pagkinabuhi man uban ni Cristo nga Emmanuel—“Ania karon, magsabak ang dalagang ulay ug manganak og anak nga lalaki, ug nganlan nila Siyag Emmanuel (nga konhubaron, ang Dios uban nato)”—Mat. 1:23:**
  - A. Tuyo sa Dios nga ipaambit ang Iyang Kaugalingon nga kinabuhi (Rom. 8:2, 6, 10-11) nganhi nato, nga mga tawong may tulo ka bahin—espiritu, kalag, ug lawas—aron himoon tang mga anak Niya (vv. 14-15, 19, 23, 29, 17) nga moumol sa Lawas ni Cristo (12:4-5) aron mahimo tang Bag-ong Jerusalem nga syudad sa kinabuhi (Bug. 22:1-2).
  - B. Aron masinati nato ang pagpaambit sa Tulo-usang Dios nga kinabuhi nganhi sa atong pagkatawo, magkinabuhi gyod ta uban ni Cristo nga Emmanuel; basahon ang Mateo kalabot ni Emmanuel—ang Dios nga nagpakatawo aron mag-uban nato—1:21-23.
  - C. Ang presensya ni Jesus mao si Emmanuel, ang Dios uban nato:
    1. Nag-uban Siya nato sa atong mga panagkatigom—18:20.
    2. Nag-uban Siya nato sa tanang adlaw—28:20.
    3. Nag-uban Siya nato diha sa atong espiritu—2 Tim. 4:22:
      - a. Ang atong espiritu mao ang yuta ni Immanuel karon—Isa. 8:7-8.
      - b. Kay nag-uban man nato ang Dios, dili gyod mailog sa kaaway ang yuta ni Immanuel—v. 10; itandi sa 1 Juan 5:4; Juan 3:6.
  - D. Ang praktikal nga Emmanuel mao ang Espiritu sa realidad nga presensya sa nahingpit nga Tulo-usang Dios diha sa atong espiritu; kanunayng nag-uban nato diha sa atong espiritu ang Iyang presensya, dili lang adlaw-adlaw kondili matag gutlo sab—Juan 1:14; 14:16-20; 1 Cor. 15:45; 2 Tim. 4:22:
    1. Mapahimuslan nato ang presensya sa Tulo-usang Dios sa panagtigom nato aron itudlo ang balaang Pulong Niya—Mat. 18:20; 28:20; Sal. 119:30; Buh. 6:4.
    2. Mapahimuslan nato ang grasya ug kalinaw pinaagi sa Espiritu nga presensya sa Tulo-usang Dios—Gal. 6:18; Buh. 9:31.

3. Ang paggiya ug pagsaksi sa Espiritu mao ang presensya Niya—Rom. 8:14, 16.
  4. Mapahimuslan nato ang pagpaambit sa Tulo-usang Dios pinaagi sa Iyang presensya isip Espiritu—2 Cor. 13:14.
- E. Aron makakinabuhi uban ni Cristo nga Emmanuel, maanaa gyod ta sa diosnong presensya Niya, nga mao ang Espiritung taghatag-og-kinabuhi nga kahingpitan sa Tulo-usang Dios—Gal. 5:25:
1. Aron makakinabuhi uban ni Cristo, magkinabuhi gihapon ta, apan dili pinaagi sa ato rang kaugalingon kondili pinaagi ni Cristo nga nagkinabuhi sa sulod nato ug uban nato isip Emmanuel; dili mahuman sa Tulo-usang Dios ang tuyo Niya nga ipaambit ang Iyang Kaugalingon sa atong pagkatawo kon naa ra Siya sa gawas nato; busa, sulodnon gyod ang pag-uban Niya nato—2:20.
  2. Si Emmanuel ang kinabuhi ug persona nato, ug kita ang galamhan Niya, nga nagkinabuhi uban Niya isip usa ka persona; nag-agad ni Emmanuel, sa presensya ni Jesus, ang pagdaog nato.
  3. Kon naa nato ang presensya sa Ginoo, duna tay kaalam, sulodnong pagpanabot, panlantaw sa unahan, ug kahibalo sa sulod kalabot sa mga butang; ang presensya sa Ginoo maoy tanan alang nato—2 Cor. 2:10; 4:6-7; Gal. 5:25; Gen. 5:22-24; Heb. 11:5-6.
- F. Kon buot tang makasulod, makapanag-iya, ug makapahimulos sa malangkobon-sa-tanan nga Cristo nga realidad sa maayong yuta, buhaton gyod nato kini pinaagi sa presensya sa Ginoo; gisaaran sa Ginoo si Moises nga, “Mag-uban nimo ang Akong presensya, ug papahulayon ka Nako” (Exo. 33:14); ang presensya sa Dios mao ang Iyang paagi kun dalan, ang “mapa” nga magpakita sa Iyang katawhan sa dalan nga angay nilang lakwan:
1. Aron hingpit natong mabatonan ug mapanag-iya si Cristo nga malangkobon-sa-tanan nga yuta alang sa pagtukod sa Dios, kuptan gyod nato ang prinsipyo nga ang presensya sa Dios maoy basihan sa tanang butang; bisan unsa pay gibuhad nato, magtagad gyod ta kon naa ba nato ang presensya sa Dios o wala; kon naa nato ang presensya sa Dios, naa nato ang tanan, apan kon mawad-an ta sa presensya sa Dios, mawad-an ta sa tanan—Mat. 1:23; 2 Tim. 4:22; Gal. 6:18; Sal. 27:4, 8; 51:11; 2 Cor. 2:10.
  2. Ang presensya sa Ginoo, ang pahiyom sa Ginoo, maoy nagdumalang prinsipyo; makat-on gyod unta ta nga magpaamping, magpabuot, magpadumala, ug magpagiya, dili sa segunda manong presensya sa Ginoo kondili sa direkta, primera manong presensya Niya.
  3. “Sa batan-on pa ko gitudloan ko sa nagkalainlaing paagi nga makadaog, magmadaogon, mabalaan, ug maespirituhanon. Apan walay usa ning mga paagiha nga nagpulos. Sa kapulihay, pinaagi sa kapin sa kan-umag walo ka tuig nga pagsinati, nakaplagn nako nga walay magpulos kondili ang presensya ra sa Ginoo. Ang pag-uban Niya kanato maoy tanan” (*Life-study of Joshua*, p. 48).
- G. Emmanuel ang tibuok Bag-ong Tugon, ug bahin ta karon ning dakong Emmanuel nga mahingpit sa Bag-ong Jerusalem sa bag-ong langit ug bag-ong yuta sa eternidad; nagsugod ang Bag-ong Tugon sa Dios-tawo, nga mao ang “Dios uban nato” ug natapos sa dakong Dios-tawo, sa Bag-ong Jerusalem, nga mao ang “Naa Didto si Jehova”—Mat. 1:23; 1 Cor. 6:17; Buh. 9:4; 1 Tim. 3:15-16; Bug. 21:3, 22; Ezeq. 48:35.

**III. Ang pagkinabuhi uban sa Diosnong Trinidad pagpakinabuhi man sa nanbanhawng Cristo sa sulod nato—Gal. 2:20b; Fil. 1:19-21:**

- A. Persona ang pagkabanhaw kay niingon man si Cristo nga Siya ang pagkabanhaw (Juan 11:25); ang Espiritung taghatag-og-kinabuhi nga Espiritu sa realidad mao ang realidad sa nabanhawng Cristo ug ang gahom sa pagkabanhaw ni Cristo—1 Cor. 15:45; Juan 14:17; 16:13; 1 Juan 5:6; Fil. 3:10; Exo. 30:22-25.
- B. Sa Cristohanong kinabuhi nato, gipatay ta sa kamatayon ni Cristo pinaagi sa Espiritung nagpuyo sa sulod ug pinaagi sa palibot nato sa gawas; nibulig ang palibot nato sa gawas sa Espiritu sa sulod aron patyon ang natural nga tawo nato aron mapadayag ang nabanhawng Cristo nga naa sa sulod nato—Rom. 8:9-10, 13b; 28-29; 2 Cor. 4:7-18:
1. Kon maningkamot ta nga molikay sa palibot nga gipahaluna sa Dios alang nato, dili ta magmalipayon ug magmalinawon; kon magpabilin ta ning limitadong palibot, makasinati ta sa pagkabanhaw—Efe. 4:1; 6:20; 2 Cor. 1:8-9, 12.
  2. Aron makasinati sa Espiritu nga realidad sa nabanhawng Cristo, mobalik gyod ta sa atong espiritu aron moampo, modayeg, moawit, o makigsultianay ba sa Dios; nagpakita ang ulohan sa Salmo 18 nga tawhanong pakigsulti-anay kini ni David sa Dios, nga nagpasabot sa pagkasuod ni David sa Dios; human sa napulo ka minuto nga pakigsultianay ug pagkonsulta nato sa Dios, madasig ta pag-ayo ug mapuno sa Espiritu nga realidad sa pagkabanhaw.
- C. Ang pagka-tawo ni Jesus mao ang tawhanong kinabuhi Niya diha sa pagkabanhaw; dili natural ang pagdani ug pagpangga sa Ginoo sa mga tawo kondili pinaagi sa Iyang kinabuhi sa pagkabanhaw diha sa pagka-tawo; nagkinabuhi Siya sa tawhanong kinabuhi diha sa pagkabanhaw, dili sa Iyang Kaugalingon, kondili sa usa pa ka tinubdan, sa ato pa, sa Iyang Amahan—Juan 5:19, 30; 14:24:
1. Kay gikinabuhi man ni Jesus ang diosnong kinabuhi diha sa Iyang tawhanong kinabuhi, nahimong mistico, misteryo, ang Iyang tawhanong kinabuhi; isip mga tinun-an sa Ginoo, ikinabuhi gyod nato ang diosnong kinabuhi diha sa atong tawhanong kinabuhi aron mapadako si Cristo—Rom. 13:14; Gal. 2:20; Fil. 1:19-21.
  2. Natinun-an ang mga magsusunod ni Cristo pinaagi sa pagkinabuhi ni Cristo isip tawo dinhi sa yuta ingon nga sumbanan sa Dios-tawo—nagkinabuhi sa Dios sa pagdumili Niya sa Iyang Kaugalingon diha sa pagka-tawo (Juan 5:19, 30), nag-usab sa ilang hunahuna kalabot sa tawo (Fil. 3:10; 1:21).
  3. Himoon gyong tinun-an sa Ginoo tang tanan aron mahimo tang diosnon ug misticong mga tawo; panggaon gyod nato ang mga tawo pinaagi sa diosnon ug misticong kinabuhi diha sa pagkabanhaw; nagpasabot ang “*diha sa pagkabanhaw*” nga wala gyoy natural sa pagpangatiman nato sa mga tawo.
- D. Nagtimaan ang nanalingsing nga sungkod nga si Cristo, ang Nabanhaw, mahimo gyod untang atong kinabuhi, pagkinabuhi, ug kinabuhi sa pagkabanhaw sa sulod nato ug nga manalingsing, mamulak, ug mamunga gyod nga mahinog [kun mahamtong] kining kinabuhia—Num. 17:8:
1. Human mosupil ang mga anak sa Israel, ingon sa nasulat sa Numeros 16, gisugo sa Dios ang napulog duha ka lider nga magkuhag napulog duha ka sungkod sumala sa napulog duha ka banay sa Israel ug ibutang kini sa Tol-dang Tigomanan atubangan sa Panghimatuod (17:4); unya niingon Siya, “Manalingsing ang sungkod sa tawong pilion ko” (v. 5).
  2. Walay dahon, walay gamot, uga, ug patay ang tanang napulog duha ka sungkod; ang nanalingsing maoy gipili sa Dios; makita nato dinhi nga ang pagkabanhaw maoy gibasihan sa pagpili sa Dios ug dili gikan sa natural natong kinabuhi ang basihan sa pag-alagad; busa, nagtimaan ang nana-

lingsing nga sungkod sa pagsinati nato ni Cristo sa Iyang pagkabanhaw ingog pagdawat sa Dios kanato isip pagbulot-an diha sa pagpangalagad nga hinatag-sa-Dios.

3. Gibasi sa nanalingsing nga sungkod ang prinsipyo sa tanang pag-alagad; giuli sa Dios ang tanang napulog usa ka sungkod sa mga lider apan gitipigan ang sungkod ni Aaron sulod sa Arka ingog walay kataposang handomanan; nagpasabot kini nga walay kataposang prinsipyo sa pag-alagad nato sa Dios ang pagkabanhaw—vv. 9-10.
4. Sa nanalingsing na ang sungkod ni Aaron, wala gyoy sukaranan nga magpasigarbo siya; nagpakita ang kasinatian niya nga nag-agad sa grasya ug kaluoy sa Dios ang tanan, ug wala tay mahimo sa atong kaugalingon—2 Cor. 12:7-9; Rom. 9:15-16, 21, 23; Luc. 1:78-79.
5. Kay naggikan man sa Dios ang atong kasarang, wala gyoy sukaranan nga magpasigarbo ta; ang buangbuang ray moingon nga mas maayo siya sa uban (2 Cor. 3:5; Mat. 26:33; Juan 21:15; itandi sa Mar. 11:9); magluwas nato sa tanang matang nga pagkalaglag ug magdapit sa grasya sa Dios ang pagkamapaubsanon (2 Cor. 12:7-9; Sant. 4:6; itandi sa Rom. 12:3; Gal. 5:26; Mat. 18:3-4; 20:20-28; 2 Cor. 4:5).
6. Ang pagkabanhaw mao ang tanang dili gikan sa natural natong kinabuhi, dili gikan sa atong kaugalingon, ug wala gibasi sa kahimoan nato; nagpasabot ang pagkabanhaw sa mga butang nga dili nato masabtan, nga dili nato mahimo sa atong kaugalingon—2 Cor. 1:8-9; 4:7.
7. Nagpasabot ang pagkabanhaw nga iya sa Dios ang tanan ug dili atoa; nagpasabot kini nga ang Dios ray makahimo ug dili ta makahimo; nagpasabot ang pagkabanhaw nga gibuhat sa Dios ang tanan, dili nato—1:12; Fil. 3:10-11.
8. Iya sa natural nga ginsakpan ang mahimo nato, ug iya sa ginsakpan sa pagkabanhaw ang dili gyod nato mahimo; matapos gyod una ang tawo ayha pa siya makombinser nga wala gyod siyay pulos—Mat. 19:26; Mar. 10:27; Luc. 18:27.
9. Makita gyod unta nato nga ang pagka-Cristohanon ug pagka-mananaog dili lang lisod—kondili imposible gyod; ang nahikay ug nahingpit nga Tulo-usang Dios ra nga nabuhi sa sulod nato isip malangkobon-sa-tanan nga Espiritu ang mahimong Cristohanon ug mananaog; kon duna tay panginahanglan, kabilinggan, o nagsagubang bag lisod nga sitwasyon, makapakigsultianay ta Niya bahin niini; unya moanhi Siya, nga nabuhi sa sulod nato, aron maoy mosagubang sa sitwasyon ug mobuhat sa tanang gikinahanglan, ug dihadayon makakinabuhi ta ni Cristo—Fil. 4:5-7, 12; 1:21.